

Cumprar art u sponsurar sport è il medem puncto taglia

Nova sentenza dal tribunal federal areguard la taglia sin plivalur

DA CLAUDIA CADRUVI / ANR

■ **La Würth International dastga trair giu la taglia sin plivalur sch'ella cumpra ovras d'art, quai ha il tribunal federal uss decidì. Suenter ina controlla aveva l'administraziun federala da taglia pretendì che l'interpresa stoppia pajar plirs tschientmilli francs per set picturas.** L'interpresa cun sedia principala a Cuira sa concentrescha sin duas spartas: Dad ina vart posseda ed administrescha ella differentas filialas, da l'autra vart procura ella las «cumissius centralas» per sias filialas. Plinavant posseda la Würth ina gronda collecziun d'art e mussa quella ad in vast public. En l'entrada da la sedia principala pon ils visitaders contemplar gratuitamain las ovras. Würth empresta sias ovras – medemamain senza tschentar quint – a sias filialas.

Controlla da l'administraziun da taglia

Il 2011 ha l'interpresa già visitada da controlladers da l'administraziun da taglia federala. Lezs han constatà che tschertas deducziuns da la taglia sin plivalur na sajan betg lubidas – cunzunt areguard las set picturas acquistadas tranter il 2007 ed il 2009. L'interpresa avess già da pajar suenter plirs tschientmilli francs taglia sin plivalur.

Würth ha protestà tar l'administraziun da taglia federala ed ha argumentà che las exposiziuns d'art vegnian la finala fatgas en l'interess da l'interpresa. L'administraziun da taglia è restada tar sia posiziun ch'il sector d'art n'haja da far nagut cun l'interpresa sco tala, uschia che deducziuns na sajan betg giustifitgadas. Era la dretgira federala administrativa ha sustegnì questa posiziun. La Würth ha sinaquai recurrì al tribunal fe-



La Würth International dastga trair giu la taglia sin plivalur sch'ella cumpra ovras d'art, quai ha il tribunal federal uss decidì. FOTO Y. BÜRKL

deral e pretendì da reducir il quint da la taglia per las set ovras d'art.

Art sco strategia d'interpresa

L'administraziun da taglia ha inoltrà al tribunal extracts da la pagina d'internet da l'interpresa sco mussament. Würth ha protestà encunter quests mussaments che duessan para demonstrar che la collecziun d'art saja en possess privat da l'acziunari principal. Quai na constettia betg: L'art saja in element central da la strategia d'interpresa. Il tribunal federal

ha lubì ils «novs» mussaments damai ch'i sa tractia gea da fatgs generalmain enconuschents.

Deducziuns da la taglia sin plivalur èn lubidas sch'ina activitad u cumpra va a favur da l'interpresa e po vegnir giustifitgada economicamain. La dretgira administrativa federala ha snegà questa premissa ed è stada da l'opiniun che l'art e la cultura da la Würth sajan in sector autonom. Il tribunal federal ha pledà per il principi da l'unitad da l'interpresa: D'in sector autonom dastgian ins pir

discurrer sche la separaziun sa manifesteschia a moda clera anoravers.

Il tepi d'orient dal coiffeur?

Expensas luxuriosas u objects da representaziun na giustifitgeschan naginas deducziuns da la taglia sin plivalur, gliez mussan autras sentenzias. Uschia na dastga in salun da coiffeur betg deducir in custavel tepi d'orient u in cussegliader d'interpresas na po betg trair giu ina sculptura d'art per ses biro, damai che tals objects servan en sasez mo al bain-

star personal. Il tribunal federal punctescha ch'i saja d'examinar da per sai mintga singul cas e da giuditgar tenor las relaziuns concretas. La Würth cuntanschia svieutas extraordinarias en la sparta «cumissius centralas» ed ella investeschia bler en sia cumparsa.

I saja era da trair en consideraziun la filosofia da l'interpresa: La Würth s'engaschia tar prominentas occurrenzas da sport – per part schizunt sco sponsor principal. «L'interpresa documentescha cun quai l'intent da vegnir enconuschenta tar vasts tschertgels era sche ses martgads da vendita sa chattan oravant tut en l'exteriur.»

Tractar l'art tuttina sco il sport

L'administraziun da taglia haja adina qualifitgà il sponsoring da sport sco activitad generala en favur da l'interpresa. En il sector d'art negligeschia ella dentant il connex, scriva il tribunal federal. Ils derschaders da Losanna èn d'in auter avis: «La parallela è evidenta.» I n'emportia betg sche l'interpresa s'engaschia sco sponsura da sport u mussia art qualitativamain aut ad in publicum vast – quai saja la finala il medem. Omaduas activitads sa drizzian ad in public che na saja betg identic cun la clientella sco tala ed omaduas activitads servian a la tgrira d'image.

Ils set objects d'art sajan integrads en la collecziun da la Würth ed in vast public haja access a l'art en la sedia principala. I na dettia nagins indizis che las set picturas stettian a disposiziun be als superiurs da l'interpresa.

Il tribunal federal dat uschia raschun a la recurrenta. L'administraziun da taglia sto reverder ses quint da taglia.

Sentenzia 2C_1115/2014 dals 29 d'avust, publicada ils 9 da settember 2016